



吾學編

皇明同姓諸王傳

一

二

三

四

皇明同姓諸王傳

皇明同姓諸王傳第一卷

吾學編第十四

海鹽鄭統

海鹽鄭統

海鹽鄭統

吳元年冬 上念七子漸長宜習勞令內侍製麻  
履行滕凡出城稍遠馬行十七步十三洪武二年  
設王相府是年令博士孔克仁授諸子經三年封  
諸子王詔曰朕荷天地百神之佑祖宗之靈當群  
雄鼎沸之秋奮興淮右賴將帥宣力創業江左曩  
者命大將軍徐達總率諸將以定中原不二年間  
海宇肅清虜遁沙漠大統既正黎庶靖安欲先論  
武功以行爵賞緣土番之境未入版圖今年春復

命徐達等西征是以報功之事未及舉行朕聞昔帝王適子正儲位衆子封王爵朕今有子十人即位之初已立長子標爲皇太子諸子之封本待報賞功臣之後然尊卑之分所宜早定乃以四月七日封第二子熈爲秦王次櫚晉王次 燕王次櫟吳王次楨楚王次榑齊王次樟潭王次杞趙王次檀魯王姪孫守謙靖江王皆授以冊寶設置相傳官屬及諸禮儀已有定制於戲奉天法古實爲生民明此彝倫非文武賢能三軍用命江左人民之助何以致此尚賴各盡心力以成治功六年春賜

諸王昭鑑錄又賜祖訓錄令書殿中宮中八年初定諸王宗人祿米每歲親王五萬石鈔錦紵絲紗羅絹布綿鹽茶粟又萬計靖江王二萬石郡王六千石鈔等減十九郡王諸子年十五人賜田六十頃爲永業除其租是年定王邸殿門名九年申書省議親王宮飾彩 上曰惟儉養德惟侈蕩心居上能儉可以導俗居上而侈必至厲民獨不見茅茨卑宮堯禹以崇聖德阿房西苑秦隋以失人心諸子方及冠年去朕左右豈可使靡麗蕩其心是年申定王府官制語在百官志中再定諸王及宮

主歲供之等秦晉燕王將之國 上令辭皇陵曰  
若等觀祖宗肇基之地當知王業艱難又命皇太  
子率三王祭開國功臣然後行會星變求言平遙  
訓導葉伯臣應詔上萬言書言分封太侈用刑太  
煩求治太速其論分封曰主上有天下掃除群雄  
如踏草芥包絡豪傑如臂使指公卿大臣數十萬  
衆戰勝攻取者一介使召拱手聽命無敢後時况  
敢有抗衡者乎傳曰都城過百雉國之害也先王  
之制大都不過三國之一中五之一小九之一蓋  
強幹弱枝遏亂原崇治本也國家裂土分封諸王

各有分地以樹藩屏復古制蓋懲宋元孤立宗室  
不競之弊然秦晉燕齊梁楚吳閩諸國各盡其地  
而封之都城宮室之制廣狹大小亞於天子之都  
賜以甲兵衛士之盛恐數世之後尾大不掉然後  
削其地而奪之權則起其怨如漢七國晉諸王否  
恃險爭衡擁衆入朝甚則緣間而起防之無及也  
議者曰諸王皆天子親子皇太子親骨肉所謂盤  
石之宗天下服其強耳禮莫大於分使王侯之國  
與京畿同則爲列國矣尚有君臣之分乎今秦晉  
燕齊梁楚吳閩諸國連帶數十城而復優之以制

假之以兵何不撫漢晉事觀之乎景帝高帝孫也  
七國諸王皆景帝同祖父兄弟子孫也一削其地  
遽構兵西向晉諸王皆武帝親子孫也易世後迭  
相擁兵以危王室遂成五胡雲擾之患分封踰制  
禍患立生援古證今昭昭然矣昔賈誼勸漢文帝  
早分諸國地空之以待諸王子孫謂力少易使義  
國小無邪心使帝盡從誼言必無七國禍願及諸  
王未之國之先節其都邑之制減其衛兵限其疆  
壘亦以待封諸王之子孫此制一定然後諸王有  
聖賢德行者入爲輔相其餘世爲藩輔可以與國

同休世世無窮矣 上大怒曰小子敢問吾骨肉  
吾見且切齒可使吾見見乎速取來吾將手射之  
且啖其肉逮至瘦死刑部獄十九年冬詔王國慶  
賀惟國城官致禮在外文武官不得赴府賀有事  
遣人啓聞不得遣將官二十年秋詔給親王歲祿  
五萬石停茶鹽布絮勿給二十六年賜諸王末鑑  
錄二十八年八月更定宗人封爵冊寶之制親王  
金冊金寶王妃金冊無寶皇太子之庶子年十歲  
封郡王塗金銀冊銀印親王適長子年十歲封王  
世子塗金銀冊銀印庶子年十歲封郡王冊印亦

如之凡王世子必以適長以庶奪嫡降庶人重則遠竄王年三十妃未有子庶子止封郡王俟王與妃年至五十無適子始封庶長子爲王世子凡嗣封受封納妃朝廷遣使行冊命禮郡王次子授鎮國次孫輔國次曾孫奉國皆將軍凡三等次玄孫等親王女曰郡主郡王女縣主郡王孫女郡君郡王曾孫女縣君郡王玄孫女鄉君凡五等靖江王府視郡王降一等宗人有文武才能堪任用者宗人府名聞考驗陞轉如常選法有犯宗人府訊問

量罪降等重斤爲庶人罰而不刑責先是 上謂

戶部尚書郁新曰朕今子孫衆盛原定親王歲祿五萬石今天下官吏軍士多俸給彌廣其斟酌古今稍節減以資乏用至是上議更定親王歲祿萬石郡王三千石鎮國將軍一千石輔國奉國將軍六百石鎮國中尉四百石輔國中尉三百石奉國中尉二百石公主及駙馬二千石郡主及儀賓八百石縣主及儀賓六百石郡君及儀賓四百石縣君鄉君次減一百石皇太子庶子既封郡王俟出閣歲賜如親王子封郡王者女俟嫁歲賜如親王

女已嫁者即王子嗣郡王者比始封郡王減半祿  
是時重定祖訓錄名 皇明祖訓遣使召諸王至  
京諭減祿之故賜 皇明祖訓九月新言親王歲  
米既有定議請令有司如數給之 上曰晉燕楚  
蜀湘府給如數代肅遼慶寧谷府遠在邊民少賦  
薄歲且給五百石齊府千石嗣秦王勿應用米有  
司月進其罷給及多寡異者並出一時權制云十  
月製二十字命名詩登玉牒三十年勅遼寧諸王  
據邊場孳牧勿侵民田是年令王府官不得三六  
九年考覈建文即位詔王國所在惟國事聽王文

武吏士聽朝廷王不得節制永樂二年諭天下諸  
司事關王府遵祖訓啓王有司合行事務不許槩  
啓若王府事馳奏不待報輒行者重罪論三年五  
月 上以代寧秦晉諸王屢驕恣然謗賜書戒飭  
諸宗人宣德元年定將軍主君儀賓品級冠服儀  
式王府官不得外調陞不知起於何時或曰靖難  
後事也然宣德中周忱以越府長史陞侍郎巡撫  
江南鄭府長史王瀹改行在戶部郎中洪熙中淮  
府長史王榮改吏科左給事中荆府長史曹曼齡  
改翰林修撰矣嘉靖八年大學士楊一清言楊士



竒以審理副選翰林編修周忱亦自長史累陞尚書成化年雷霖以德府長史爲山西提學副使又言布政使雍泰秦府有姻亦陞巡撫都御史乞容王官與別官一體陞用王親亦選京官吏部議此祖宗微意如近年江西婁性足爲監戒况王親縱不得京任得仕至左右布政使官與尚書等使非區區自懷重內輕外之心則展布才猷亦足自見一清請再議吏部執不可二十二年蜀府長史高鵬九年考滿至吏部吏部請奪職遂請王府官凡稱病乞改用者並勒致仕輔導失職調者不得授

府州縣親民官時陝西山西河南湖廣積欠王祿百數十萬有司不能給宗人輒告飢譁有司有司或杜門或逾墻走每下詔卽念宗人歲祿顧歲祿百倍洪武時有司竟不能給初制定親王歲祿萬石惟肅岷府千石正統初岷府加二百石後加三百石伊遼府二千石韓府三千石唐府五千石代府六千石郡王將軍中尉儀賓之祿幾千倍於國初於是宗人有上言願停祿如唐宋故事得應舉效用者有請田力耕自養者竟莫敢決宗人有罪者錮高墻高墻在中都凡先後入高墻者男女且

千人嘉靖四年釋二百九十八人十二年釋十三人  
十三年又釋三十八人十八年又釋四十五人傳  
還原邸給薪米自便

### 廟祔十五王

廟祔十五王初從祀四祖廟東廡壽春下蔡南昌  
盱眙寶應來山英山昭信凡八王西霍丘安豐蒙  
城臨淮六安都梁山陽凡七王熙祖皇后生仁祖  
及壽春王仁祖陳后生南昌盱眙臨淮三王三王  
皆高帝同母兄也十五王惟壽春盱眙霍丘安豐  
蒙城臨淮六妃配會南昌王者文正父也妃王氏

祔葬皇陵不入配正德中御史徐文華言族無後  
者祭終兄弟之孫之身今太廟配享諸王未審於  
高皇何親大抵非兄弟即伯叔至於今五世六世  
矣禮宜祧禮官議不從嘉靖中建九廟東西廡配  
如故九廟災復同堂異室之制祔十五王於兩序  
先是洪武二年定從享禮稱壽春王皇伯考南昌  
霍丘下蔡安豐蒙城盱眙臨淮七王爲皇兄寶應  
六安來安都梁應山山陽昭信七王爲皇姪壽春  
王稱皇高伯祖考寶應七王稱皇曾伯祖考若與  
宣宗英宗兄弟行者誤也鳳陽有十王四妃墓

在自塔陳后二女長太原長公主駙馬都尉王七  
一次孝親公主追封隴西長公主駙馬都尉思親  
侯李貞岐陽王父也南昌王有女福成公主蒙城  
女慶陽公主洪武四年定親王女稱郡主禮官請  
降二公主 上念二兄早歿惟二女吾不忍降奪  
與祿歲五百石駙馬都尉王克恭黃琛爲福建淮  
安衛指揮使仍稱駙馬倉指揮使俸

懿文太子

懿文太子標母 高皇后元乙未九月生于太平  
陳迪家 上爲吳王立爲王世子從宋濂受經吳

元年年十三矣 上遣世子及弟謁臨濠墓諭曰

世稱商高宗周成王爲守成令主高宗舊勞於外  
成王早聞無逸之訓皆知小民疾苦故其在位勤  
儉不敢驕逸見生長富貴習於晏安今出旁近郡  
縣遊覽山川經歷田野因道途險易以知鞍馬勤  
勞觀小民生業以知衣食艱難察民情好惡以知  
風俗美惡即祖宗所居訪求父老問吾起兵渡江  
時事識之於心以知吾創業不易又命中書省擇  
官輔行凡所過郡邑城隍山川之神皆祭少牢過  
太平訪迪家賜白金五十兩至泗濠以 上意告

祭祖考妣考妣及兄弟墓是冬從上觀郊壇令左右導之農家徧觀其服食器具又指道旁荆楚曰古用此爲朴刑以其能去風雖傷不殺人古人用心仁厚如此兒念之洪武元年正月立爲皇太子帶刀舍人周宗上書乞教太子上嘉納中書省都督府放元制請以太子爲中書令不許曰吾兒年未長學未充更事未多宜尊禮師傅習經傳博古通今識達機宜他日軍國重務皆令啓聞何必爲中書令乃選勲德老成舊人動有典則及新進之賢者兼領東宮官於是左丞相善長右丞相

達中書平章錄軍國重事遇春兼太子少師少傅少保右都督馮宗異兼右詹事 中書平章政事胡廷瑞廖永忠李伯昇兼同知詹事院事 中書左右丞趙庸王溥兼副詹事 中書叅政楊憲傅瓛兼詹事丞同知大都督廉茂才張興祖兼左右率府使大都督府副使顧時孫興相兼同知左右率府事 兼大都督府事吳楨耿炳文兼左右率府副使御史大夫愈和兼諭德御史中丞基溢兼贊善大夫治書侍御史文原吉范顯祖兼太子賓客諭之曰朕東宮不別設府僚而以卿等兼領者蓋軍旅未

息朕若有事於外必太子監國若設府僚卿等在  
內事當啓聞太子或聽斷不明與卿等意見不合  
卿等必謂府僚導之嫌隙易生朕所以特置賓客  
諭德等官輔成太子德性且選名儒爲之賓客昔  
周公教成王克詰戎兵召公教康王張皇六師此  
居安慮危不忘武備蓋繼世之君生長富貴泥於  
安逸不諳軍旅一有緩急罔知所措二公所言不  
可忘也是年上命選國子生國琦王璞張傑等  
十餘人侍讀書禁中琦等入對謹身殿姿狀明秀  
應對詳雅上喜因謂殿中待御史安慶儒士郭

淵友等曰吾觀諸生於文藝素習矣然與太子處  
當端其心術養其德性庶不流於浮靡太子之德  
亦當有助因厚賜之未幾以梁貞王儀爲太子賓  
客秦鏞盧德明張昌太子諭德先是建大本堂取  
古今圖籍充其中徵四方名儒教太子諸王分番  
夜直選才俊之士充伴讀上時時賜宴賦詩商  
確古今評論文字無虛日命諸儒作鍾山龍蟠賦  
置酒歡甚又自作時雪賦賜東宮官儒官服令三  
師賓客諭德朝賀東宮東宮答拜二三年命東宮  
及王府官編輯經史古人行事可爲鑒戒者訓諭

太子諸王四年春製大本堂王記賜太子十年六月令自今政事並啓太子處分後奏聞因諭曰人君治天下一日萬幾自古創業之君歷涉勤勞達人情周物理故處事咸當守成之君生長富貴若非平昔練達少有不繆者故吾特命尔日臨群臣聽斷諸司啓事以練習國政惟仁不失於踈暴惟明不惑於邪佞惟勤不溺於安逸惟斷不牽於文法凡此背心爲權度凡人雖有明敏之資自非歷練臨事率意而行未免有失知悔而改亦已晚矣吾自有天下以來未嘗暇逸於諸事務惟恐毫髮

失當以負上天付托之意戴星而朝夜分而寢尔所親見尔能體而行之天下之福吾無憂矣時令儒臣爲太子講大學行義二十二年置詹事院上諭吏部侍郎侯庸曰輔導太子必得忠正賢良之士以兵部尚書唐鐸兼詹事二十四年八月勅太子巡撫陝西上意欲都陝西遣太子相宅也旣行使諭曰尔自幼至長未嘗遠出今命尔巡行陝西方渡江天道赫然有變雷起東南尔征西北以造化言之雷天威也尔前行雷後從威震之兆也然一旬之間久陰不雨占法主陰謀事尔宜慎

舉動節飲食嚴宿衛親君子遠小人務在存仁養性施仁布惠以回天意雷之嘉兆未可恃也尔其慎之比還獻陝西圖遂病病中上言經畧建都事二十五年四月丙子卒 上慟哭命禮官議喪禮戊寅 上御東角門召諭廷臣吾老矣太子不幸命也大哭而退既公除 上不忍禮官請之始鳴鍾鼓朝京耆老上香慟哭 上亦哭諭曰尔念太子意良厚顧農事方興諸父善勤生亟歸勿失時諸未至者諭朕此意八月庚申祔葬孝陵東謚懿文冊曰朕惟先王之典生既有名歿必有謚名所

以彰德謚所以表行故行有大小則謚有重輕此古今通義雖在至親不敢廢也尔皇太子標居位二十有五年分理庶政裨贊弘多今焉未逝特遵古典從公議賜尔謚曰懿文嗚呼德以名彰行因謚顯公論所在朕何敢私建文元年追尊爲孝康皇帝廟號興宗靖難後復稱懿文皇太子太子元配常氏開平王女太子既立 上念王有大功早卒遂冊其女爲皇太子妃先太子數年卒謚懿敬建文君即位追尊爲孝康皇后靖難後復稱懿敬皇太子妃太子繼妃呂氏生建文君妃父本壽州

人仕元爲元帥府都事丙午歸附爲中書掾史累  
官吏禮二部尚書出爲都轉運鹽使終太常卿本  
無子洪武中卒建文君即位尊妃爲皇太后靖難  
兵入金川門遣人逐太后太后至 成祖述不得  
已起兵之故太后還未入宮宮中火起建文君遜  
去建文四年七月隨其子敷惠王允熾居太子陵

### 秦王

秦王棧洪武三年年十五受封二十三而之國西  
安初聘元河南王王保保女弟繼妃寧河王女也  
王生而岐嶷嚴毅英武 上委以關西兵事得專

行賞罰歲秋巡邊大將皆聽節制御軍整肅所過  
秋毫無犯未嘗妄戮一人二十七年征降西番賜  
璽書賞賚萬計時露宿山野遘疾尋卒在位二十  
七年年四十 上命禮部尚書任亨太定喪禮謚  
愍愍王六子長尚炳二十八年嗣在位十八年卒  
謚隱次末與簡愍王尚烈保安懷僖王尚煜與平  
恭簡王尚炳末壽懷簡王尚烜安定王尚炆尚炆  
末樂十年坐罪降庶人安置泗州宣德末赦守愍  
王墳隱王子四人嫡子志垣末樂十年嗣在位十  
三年卒謚僖無子庶兄志均末樂二十二年以渭



南王進封王請長興侯故宅處諸弟又請選良家  
女入宮令擇護士家女酬直勿抑勒在位三年卒  
謚懷妃張氏未婚而寡宣德元年令入宮守王服  
王無子弟志潔宣德三年以富平王進封王四年  
坐罪辭三護衛在位二十八年卒謚康志塚宜川  
莊靖王也康王五子長公錫天順二年以秦世子  
嗣在位二十九年卒王好文睦族知禮謚惠公鍵  
未封卒公銘臨潼惠簡王嘉靖十七年以孫秉機  
嗣王追封秦安王公鏗郃陽惠恭王公鎰汧陽端  
懿王惠王四子長誠涑成化四年以鎮安王嗣在

位十一年卒王好書崇儉有禮謚簡誠滄誠河誠  
淖皆未封簡王無子安王六子誠深嗣臨潼王謚  
和僖嘉靖十七年以子秉機嗣王追封秦莊王誠  
潤誠浩誠澈誠波誠注皆鎮國將軍莊王二子秉  
機以嗣臨潼王弘治十三年進封王在位二年卒  
謚昭昭王三子長惟焯正德四年嗣次惟燁次未  
名王請潼關以西鳳翔以東河壩地曰 皇祖以  
賜臣先王櫜也戶部尚書梁材執議曰陝西外供  
三鎮內給四王民困已極視國初生產物力千萬  
不侔豈得空地更給諸王 上從材言不許王早

失父母育於簡王妃廖氏廖妃卒王喪如禮事其  
生母蕭妃孝謹守臣以王謹身修行聞遣勅使持  
旌幣旌王嘉靖二十年上黃金千兩白金萬兩助  
建宗廟 上喜加祿歲二百石贈王帶一

晉王

晉王桐年十三受封又七年之國太原已而得罪  
廢懿文太子調護得還洪武三十年卒謚恭世子  
濟熿嗣靖難後封濟熿弟濟熿平陽王濟 慶成  
王濟熿子美圭封晉世子濟熿狠戾失愛憾其父  
并憾濟熿不為解疾慶成諸王日訴濟熿過於朝

又誘府中官校誣濟熿罪竟奪濟熿爵并廢美圭  
為庶人守恭王園濟熿遂得嗣王益驕橫百方幽  
苦濟熿父子恭王有老媪不能平走訴 文皇立  
召獄中晉府承奉左徵問之盡知濟熿搆濟熿狀  
即釋徵馳驛召濟熿父子時濟熿囚空室已十年  
左徵者濟熿嘗言其佐濟熿為逆逮治京師府中  
言徵久死矣徵至一府大驚徵入空室解濟熿縲  
繼相抱持六慟濟熿自是怨望出悖語濟熿父子  
見 上行在所濟熿病憊甚 上見之惻然不直  
濟熿遂封美圭為平陽王俾奉父居平陽恭王故

有田在連伯灘 文皇與美圭矣濟熿奪不與美圭聞上 仁宗再三諭濟熿還美圭不從美圭言連伯灘地隸平陽不隸太原因及曩誣搆事 仁宗遣人視灘果隸平陽又書諭濟熿美圭父子困頓累年詩曰眷令在原兄弟急難每用吟詠感念無已緬惟賢弟同吾此心又書諭美圭朕諭晉王讓汝田兄弟叔姪本同一氣姪事叔益恭愛久當憐汝濟熿得書又聞朝廷賜濟熿王冠服遂廣致妖巫府中造呪咀事 仁宗崩又不服喪 宣宗即位憐濟熿父子時時問勞濟熿呪咀事益露踪

跡自度罪不可解遣人結高煦謀不軌日夜造兵器寧化王濟煥告變 上曰勿洩濟熿固自知益反側熿與交通書 上又曰勿洩濟熿固自知益反側不安其所遣詣高煦人又走京師首服內使劉信又奏濟熿擅取屯糧十萬餘石給護軍欲反應高煦并呪詛事寧化王又言濟熿毒弑其母濟熿始懼辭王爵及護衛不聽遣書及勅符召濟熿至示以諸所發奸逆狀濟熿伏地頓首言臣罪萬死 上書諭諸王去歲高煦反罪人既得奸黨人皆言趙晉二王實與謀予未忍信今晉府人累上告變

徐察之有驗不誣趙王自知事不可掩已辭護衛  
濟熿得罪宗社不敢以私親廢大義謹遵祖訓免  
為庶人屏之鳳陽誅其同謀及妖巫數人恭王妃  
在晉府者令美圭迎平陽奉養復濟熿晉王卒謚  
定美圭正統初嗣王卒謚憲子鍾鉉嗣卒謚莊奇  
源世子未嗣卒以孫嗣王贈晉靖王靖王子表  
世孫未嗣王卒以子嗣王贈晉懷王懷王子知焯  
以世曾孫嗣卒謚 姪新塹以新化王庶長子嗣  
王新化王者晉靖王次子表樵也謚恭裕恭裕王  
子端和王知燿端和王二子新塹新塹端和王卒

晉王請端和王庶長子新塹嗣新化王未封而晉  
王卒無子晉靖王庶子榮澤王表樾與新化諸王  
皆晉王叔兄弟也曰嗣王者非新塹即新塹然皆  
幼攝府事則我長晉王妃王氏曰晉王無後次及  
新化王新化王父子卒有孫新塹在也即召入府  
拜几筵為後行喪榮澤王忿我叔父行顧不得王  
新塹端和王長子長子不得為人後新塹宜嗣新  
化王新塹嗣晉王禮也疏下禮部議新塹宜嗣晉  
王俟服闋請封又言制親王絕郡王以序繼親王  
爵其郡王不得復請繼封次子止封鎮國將軍新

典得嗣晉王贈父晉康王

### 周王

周王橐秦晉二王皆高皇后子周王育於孫貴妃妃卒服以慈母斬三年主喪事洪武三年封吳王國錢塘工部尚書張允請建諸王府上曰吳府且勿建七年置杭州護衛上以浙江財賦地不可封王罷護衛十一年改封周王國開封即宋故宮爲府二十二年王棄其國來鳳陽遷之雲南未行原還國建文中人告王反建文君命曹國公即訊景隆大索金寶王不能應坐王反王至京竄

雲南諸子並別流放已而召還南京靖難兵入金川門王與齊王見成祖且拜且哭因並轡行登樓相慰又哭遂得復封王加祿五千石以開封地於河改建邸洛陽已而又還開封封其長子有燉爲周世子有勲汝南王有烜順陽王有燿祥符王有熿新安王有光永寧王有燾汝陽王有燿鎮平王有熿宜陽王永樂二年來朝獻騶虞八年請祀太祖國中上書諭支子不得祭太祖王國祖始封之君不許已而數有過上輒赦不問有告王反者遣都御史王彰諭意王大懼上還護衛

仁宗即位加祿五千石通前一萬石卒謚定子有焯嗣宣德元年王請詣闕謝諸弟封不許止弟汝南王有勳數誣王 上爲書諭王先是有勳與有熹素惡有焯爲與趙王書刻祥符王印記封識置彰德城外道傍都指揮王友得書聞上 宣宗疑有離間逮友訊無迹召有焯至曰必有勳也爲此書者又召有勳訊服詞連有熹有勳志行故不減少與高煦善建文中嘗告父定王反定王竟囚繫除國靖難後始釋遂乞誅有勳 上遣有勳去雲南居大理後定王老始歸河南有熹喜生食人腦

肝膽薄暮每伺人過門輒誘入殺而食之以故其邸前日未晡即斷行跡 宣宗惡有勳有熹免爲庶人留有熹居京師已復爵有焯卒謚憲弟祥符王有焯嗣景泰三年卒謚簡子世子子壘嗣卒謚靖無子弟通許王子墜嗣卒謚懿子同鏹嗣卒謚惠子安瀕世子卒以子睦樞嗣贈周悼王睦樞卒謚恭世子勤熄未嗣卒世孫朝垞迎駕加祿歲三百石贈金幣嘉靖十八年嗣王二十一年巡撫魏有本上言河南諸宗人缺祿米三百萬石諸將軍安瀕等五百人譁推行臺門凌逼撫臣安瀕坐革

爲庶人二十一年王及宗人獻白金六千兩助修太廟賜王帶一圍衣一襜

### 楚王

楚王楨母胡克妃甲辰年生七年而封國武昌末樂元年世子孟煊市人河南諭世子世子來朝請昇府邸諭侯有年三年王出鐵牌開武昌城門都司聞上不許卒謚昭孟煊嗣宣德元年發楚魯二王護兵各千人征安南王請湖廣都司給護兵兵器伍年有告王者乞減護衛二之二王宮火林火譜系符勅吏給之卒謚莊子季塊嗣卒謚康弟

季叔嗣卒謚憲子均鉞嗣卒謚靖子榮滅正德七年嗣在位二十三年卒謚端子顯榕嘉靖元年以長樂王封世子十四年嗣子英耀十六年以世孫封世子嗣王

### 齊庶人

齊庶人博洪武二年封青州府十五年上令出獵開平且備胡二十四年春勅再出開平時穎國公傅友德總兵諭勿相叅奏凱勿矜功八月秋高水冷回京建文時有告變者召至京廢爲庶人時周王已削爵與博皆繫禁靖難兵至急遣兵衛二

王二王不知靖難兵也大怖伏地哭已知之乃大喜曰吾屬幸不死矣永樂改元復封又封其子賢熒爲樂安王賢煥長山王賢寔平原王棖之國驕縱上輒書諭戒來朝又面諭棖曰無忘患難時棖益自疑陰蓄亡命着刺客僭帝號爲說詛輒用護衛兵守青州府城北門自廣智門外接園苑築墻截往來守吏不得登城夜巡李琪曾名深等上變告棖匿其人滅口三年賜書索琪諭棖改過是月周王橚上書悔罪上封橚書示棖明年來朝面謝廷臣劾棖罪請論如法棖厲聲曰奸臣喋喋

無乃效建文時殺我會當畢研此輩上聞之益怒雷棖京邸奪其護衛指揮柴直等伏誅罷遣罪斥府諸寮盡出王繫囚及諸造不法械噐群臣又請罪教授葉垣等上曰齊王凶悖縱恣性習使然朕與王君臣兄弟出之囹圄寵以祿爵恩禮渥洽誠心溫詞開諭至六七不悛教授輩柰王何況垣等皆先自歸發其事可勿論棖留京益有怨言乃召其子至京父子並奪爵妃吳氏先卒葬青州宣德二年福建妄男子樓濂詭稱七府小齊王建陽人製王冠服謀不軌縣發其事械至京誅數百



人搏及賢熒三子暴卒景泰五年五月勅南京守備叅替齊庶人谷庶人安置廬州者移置南京慎防之時齊庶人賢熒搏少子也尚幼谷庶人絕而齊庶人請得谷庶人第嘉靖十三年釋高墻庶人長鑿者搏曾孫也

### 潭王

潭王梓母達定妃洪武二年纔二歲受封封十五年之國王幼聰敏好學善屬文嘗召府中儒臣設醴賦詩爲品高下出邸中其爲賞洪武二十三年妃與民家坐事王不自安上遣使慰諭且召王

入見王大懼與妃自焚死無子國除

### 趙王

趙王杞洪武二年生明年四月封趙王封之日秦晉燕吳楚五王并殿受冊寶齊潭趙魯四王幼內宮保抱抱四王就位保抱受冊寶也又明年杞卒

### 魯王

魯王檀母郭寧妃其妃湯信公女王生兩月而封洪武十八年之國交州幼聰敏好文學善詩歌好餌金石藥二十二年發病卒命禮部尚書李原名議喪禮上曰父子天性謚法公義朕不得以私

恩廢公義可謚荒子肇輝末樂元年嗣王宣德初  
上言長史鄭昭賢而老請致仕 上諭蹇義曰魯  
王賢禮士宜如請宣德九年卒謚靖子泰堪成化  
三年嗣九年卒謚惠子陽鑄成化十二年嗣嘉靖  
十二年謚莊世子當從早卒嘉靖十三年以孫觀  
焯嗣王贈魯懷王懷王子健棧封世孫早卒以子  
觀焯王贈魯悼王

皇明同姓諸王傳第一卷終

子履準校正

皇明同姓諸王傳第二卷

吾學編第十五

海鹽鄭曉

蜀王

蜀王椿母郭惠妃滁陽王女也洪武四年生生十  
一年而封成都惠妃生王及代谷二王永樂汝陽  
二公主王元妃涼國公女王讀書好善近儒生能  
文章 高皇呼爲蜀秀才未之國歲清明遣祭滁  
陽王墓於滁州之國初即聘漢中教授方孝孺教  
世子待以賓師禮推恩母族歲時問遺不絕常發  
祿贍郡教授月一石當是時邊王歲出塞征胡王

以雅好學問守西垂安靖與民休息永樂三年來朝二十一年卒謚獻六子長悅熈次悅燿悅燁悅忻悅燿悅熿悅熿早卒謚悼莊世子嫡孫友堦永樂二十二年嗣初友堦爲世孫叔華陽王悅燿謀奪適獻王怒斥去不悛囚而繫之又不悛益怒誣友堦罪於朝 文皇召友堦叔姪自明比至 文皇崩 仁宗察悅燿誣世孫得嗣王之國未幾悅燿又走京師誣友堦 仁宗怒抵奏地下曰適庶大倫干分誣親獨不畏鬼神乎謂侍臣曰悅燿虧忠孝懷奸讒使歸蜀終亂其國徙武岡州又徙澧

州宣德五年友堦府中忽舉炮銃總兵陳懷聞

上罪府官 上還護衛三之一已而請王府官屬

留軍中南人爲匠皆從之宣德六年卒謚靖無子

宣德七年弟友堦以羅江王嗣友堦獻王孫靖王

母弟也宣德九年風疾 上念王賢走醫調視未

至卒謚僖無子叔悅燿宣德十年以保寧王嗣儉

飭守禮法天順五年卒謚和子友堦善草書天順

七年以世子嗣是年卒謚定子申鉞天順八年嗣

成化七年卒謚懷無子是年弟申鑿以通江王嗣

好學能文弘治六年卒謚惠明年子賓瀚嗣仁厚

好儒術正德三年卒謚昭明年子讓榘嗣嘉靖十  
五年守臣言王忠孝賢良 上特褒賞二十年上  
黃金千兩白金萬兩修宗廟加祿歲二百石王帶  
一王受玉帶辭祿世子承鑰

### 湘王

湘王柏洪武四年生生八年封荊州母胡順妃豫  
章侯美女也王明敏好學能文章尤喜道家言自  
號紫虛子膂力過人握弓矢刀槊上馬奮如飛建  
文元年或告王反建文君遣使即訊王懼縱火宮  
中奮身投火妃從之闔宮皆死謚戾妃江陰侯高

女無子國除葬江陵西太暉山靖難後改謚獻治  
其塋祠

### 代王

代王桂其妃武寧王女洪武十一年封豫王二十  
四年改封代王明年之國大同建文時廢爲庶人  
靖難後復封宣德二年王請得樂器制器王妃仁  
孝文皇后妹也王不悅妃妃病王不視孫仕壘聞  
於朝乞勅潞城王遜炘啓王善視妃九年王欲率  
諸子孫來朝不許王又與其子遜炘燭襲衣冠  
遊行市中袖錘斧傷市人 上與書戒飭稍斂戢

正統十一年卒謚簡十一子世子遜端早卒正統十二年以子仕壘王贈代戾王仕壘正統十一年嗣嘗上言總兵郭登有功大同虜欲得大同爲巢穴非登大同不能守朝廷爲勞登天順七年卒謚隱子成鍊嗣弘治二年卒謚惠子聰沫嗣坐罪徙山西省城弘治十一年卒謚思子俊杖嗣嘉靖三年大同軍叛王東走宣府上遣光祿少卿蕭淮問王嘉靖六年卒謚懿九年子克權嗣請郡王庶子祿禮部言郡王庶子無長兄得嗣郡王者封長子不復得支將軍祿長孫亦如之不許十一年大

同軍又叛王東走宣府

上又遣官問王王父子

再遭禍變忠慎自檢得不爲諸逆染鱗十八年秋樂昌王乞徙代州禮官周旋得徙朔州禮科都給事中丁湛上疏曰樂昌一府以城域狹隘物價騰貴得徙代王亦以是爲請何以應之天下宗藩類皆聚處一城亦皆以是爲請又何以應之况代藩北控邊鄙南輔圻甸比之他藩尤爲要重數年以來叛者繼起稔惡不悛皆積疑所致近甫少寧正宜休息示以安靜乃今宗親無故改遷搖惑衆志不可已而樂昌王竟徙朔州先是景泰五年昌化

王仕潭言大同地瘠乞移封就祿便養 景帝亦不許

### 肅王

肅王煇洪武十一年封漢王二十四年改封肅王於甘州建文元年乞內徙徙蘭縣永樂十七年卒謚莊庶長子瞻熒二十二年嗣正統元年言甘州舊邸改都司而先王墳園尚在乞留近邸林木從之府中嘗被盜劫榜募告捕者賞馬銀御史以聞罪其長史楊威又請加祿 宣宗曰洪武永樂間肅王歲祿五百石莊王不言者以朝廷念地遠輸

轉甚難故也 仁考即位加五百石矣朕遵祖訓不敢違天順八年卒謚康子祿埤成化四年以洵陽王嗣十五年卒謚簡子貢鏞成化二十三年以汾川王嗣正德中為諸子請菜戶不允嘉靖十五年卒謚恭子真淤弘治四年封世子嘉靖五年卒謚安和次子弼桄初封鎮國將軍嘉靖十一年改封世孫十七年嗣王贈其父肅靖王

### 遼王

遼王植洪武十年生母韓妃也生二年封衛王改遼王國于遼東廣寧城廣寧五衛盡屯田給王祿

王得巡邊出塞練簡士馬已而坐罪奪祿衛靖難  
兵起渡海歸朝改封荊州 文皇即位來朝卒謚  
簡子貴烱嗣正統元年府臣乞加祿 上言簡王  
得罪朝廷 太祖特加原貸削其儀衛止與尉校  
三百人 仁宗命今王嗣倍加祿得支二千石  
宣宗又與旗軍三百人朝廷親親已至王於庶母  
諸弟寡恩府臣不聞匡正直為王請加祿不允四  
年坐滅絕天理瀆亂人倫廢為庶人簡王第四子  
貴燮以典山王嗣卒謚肅子豪盛嗣世子恩鏞卒  
謚榮穆王請以世子妻妾殉葬 憲宗不許卒謚

靖子恩鏞嗣卒謚惠子寵浚嗣卒謚恭子致格嘉  
靖三年嗣卒謚莊子憲櫛初封句容王嘉靖十八  
年嗣

慶王

慶王梅母余妃洪武十一年生二十四年封慶陽  
二十六年徙韋州建文三年冬移寧夏 文皇令  
歲一至韋州度夏宣德初上言寧夏卑濕水泉惡  
乞仍居韋州不許許歲一往來韋州如 文皇時  
未幾護衛人告王閱兵造戎器購天文書 上書  
諭王小人誣叔祖置之法慎勿疑內臣馬安住歸

自寧夏言王以謗故不自安 上又書慰王五年  
王請入朝不許王遂請移家寧夏如永樂洪熙得  
往來韋州許之正統十三年卒謚靖子秩煇十四  
年嗣景泰元年以虜數入寧夏與其弟安化王秩  
煇上書乞徙內地不許又言冕服以紗製請易紵  
絲 上曰祖制朕不敢易成化五年卒謚康子邃  
雖成化七年以平涼王嗣弘治四年卒謚懷弟邃塤  
成化十七年以岐陽王嗣弘治四年卒謚莊子寘  
鏊弘治七年以洛交王嗣十年卒謚恭子台宏弘  
治十六年嗣時虜數入塞賊發恭王墓嘉靖四年

謀不軌法司請如代王聰沐例徙西安 上不許  
降庶人畱邸歲與米三百石已又不悛徙西安其  
長子肅檣封世子攝府事十二年世子及懷王妃  
王氏乞恩畱台宏故邸禮官執議不可十五年兩  
宮徽號詔許台宏還邸與冠帶郡王九安化反誅  
絕安化王寘鏞者慶靖王曾孫也祖秩煇慶靖王  
第四子永樂十九年封安化王謚惠懿文邃塤封  
鎮國將軍弘治六年贈安化榮和王寘鏞成化二  
年封長孫弘治五年嗣正德五年奄瑾擅權毒亂  
天下寘鏞遂起逆謀告生員孫景文曰日者言我



有帝王骨相王九兒降鸚鵡神妄言禍福每見寘  
鑄呼老天子寘鑄益冀望非分會大理少卿周東  
度田寧夏倍益頃畝畝索厚值徵馬屯租甚急景  
文謂寘鑄曰殿下欲圖大事此其時矣寘鑄遂爲  
酒召都指揮何錦周昂指揮丁廣謀反以誅奄瑾  
爲名是年四月五日寘鑄爲酒大會巡撫安惟學  
總兵姜漢周少卿李守奄奄及漢至巡撫少卿辭  
不至錦等矯言虜入塞急呼壯士申居敬等捕虜  
執兵械跨馬呼噪儀宿韓廷璋等伏府序下錦等  
趨安化府椎門入序中伏兵起殺漢及奄走行臺

殺惟學都指揮楊忠又殺周少卿縛侯叅議放獄  
囚焚官府劫庫藏奪河舟大索慶諸王將軍金幣  
萬計呼召逆黨章虜城千戶徐欽引兵入城僞造  
印章旗牌又令景文爲僞檄言瑾蠱惑朝廷變亂  
祖法屏棄忠良收集兇狡阻塞言路括歛民財籍  
沒公卿封拜侯伯數興大獄羅織無辜散遣官校  
脅持遠近張綵劉機曹雄毛倫文臣武將內外交  
結意謀不軌今特舉義兵清除君側凡我同心並  
宜響應傳布邊鎮以錦爲討賊大將軍昂廣左右  
副將軍景文軍師張欽先鋒將軍魏鎮等七人都

護朱霞等十二人總管當是時遊擊將軍仇鉞陷賊中欲起擒賊自效恐河東兵未集稱病卧鉞蒼頭潛入城言副總兵楊英都指揮韓斌延綏副總兵侯勛遊擊將軍時源各率兵屯河上廣武營都指揮孫隆焚兩壩掃捲河舟盡奪泊東岸矣鉞喜尚稱病卧錦率都指揮鄭卿等三千人出覘渡口留昂守城昂問鉞病鉞猶稱病不起伏諸蒼頭候昂入殺昂鉞即起開門一呼諸遊兵壯士楊真等聞之即趨安化府殺朱霞等十一人擒寘鐸及其子台潛遣古興兒密告鄭卿令反正卿遂殺魏鎮

等十人錦廣走追擒之賀蘭山外朝廷聞變遣都御史楊一清太監張永督諸軍討賊未至寧夏賊平一清永至陝械寘鐸錦廣等至京頌繫寘鐸諸王館錦廣等下錦衣獄廷鞠伏誅弟寘鐸寘鐸坐黨廢庶人將軍寘材俘至京既論死正德中山僧大千和尚者富財凌同類同類毆和尚和尚憤曰我皇帝家人也衆異其言聞於朝逮至京下刑部獄和尚曰我安化府寘材也衆不能辨安化官人左寶瓶在浣衣局召驗和尚寶瓶叱曰此寘材殿下得免死送高墻竟不能知當時代寘材死者誰

也

### 寧庶人

寧庶人宸濠寧獻王權世孫也洪武十四年封獻王於大寧大寧在喜峰關外古會州地洪武初設北平行都司大寧城中東聯遼東西接宣府爲巨鎮文皇時封北平每歲秋九月會廣寧遼王及寧王宣府谷王大同代王太原晉王西安秦王韋州慶王甘州肅王出塞捕虜名肅清沙漠以故諸王皆有重兵文皇靖難初與諸將議曰曩余巡塞上見大寧奈顏諸夷驍勇善戰戍卒皆問左罪

謫不能寒吾得大寧斷遼東得胡兵助戰吾事濟矣乃令世子居守率銳卒千人倍道趨大寧遺書寧王言窮蹙求救吾弟王邀文皇單騎入城執手大慟言不得已至此南兵百萬旦夕且破北平非吾弟表奏不可寧王爲草表謝請赦居數日款洽不爲備北平銳卒伏城外諸親密吏士稍稍得入城遂令陰結諸胡酋長及思歸之士皆喜定約文皇辭去寧王餞郊外伏兵起執寧王擁入關諸胡戍卒一呼皆集守將朱鑑不能禦戰沒總兵官都督劉真遜還京師行軍都督陳亨皆降燕於是

靖難兵益強當是時寧王善謀時草檄傳諭靖難  
後遣內官書諭王再三王入朝相見甚歡因乞改  
南土初欲得蘇州上曰蘇州圻內不許又欲得  
杭州上曰五弟初封錢塘為吳王皇考以為  
不可改開封建文無道封其弟允熲為吳王竟不  
克享建寧荊州重慶東昌皆善地惟弟擇焉寧王  
得書遂出飛旗令有司治馳道上大怒王不自  
安屏從兵從五六老中官走南昌稱病卧城樓乞  
封南昌上不得已即藩司為府改封王已而人  
告王誹謗巫蠱事上書諭王王不自安稍稍自

斂戢仁宗即位乞朝京師又言江西非其封國  
請改封上諭王叔受封先帝已二十餘年朕不  
敢違宣宗即位以大父行又復輒恣橫請於封  
內選子女不許重違其意賜女婦八十四人王令  
省中官服朝服用天子儀仗賀王元旦長至千秋  
節習儀鐵柱觀副使石璞聞於朝乞罪其長史王  
堅朝議定宗室將軍祿米視品王抗言宗室安得  
有品詞不遜時漢庶人方以反誅上答書詞甚  
厲云將軍中尉有品祖訓也王不得棄祖訓  
肆煩說王即不謹非獨群臣有言不已天下人心

亦不容已徒恃尊屬誣讎朝廷典憲具存朕不敢  
庇未幾又乞灌城田不許稍斂戢托志神仙正統  
十三年卒謚獻子盤斌木嗣卒謚莊惠世子景泰  
元年以子奠培嗣王追封寧惠王奠培以世孫嗣  
王景泰七年坐事革護衛弘治四年卒謚靖靖王  
長子觀錫天順八年封上高王弘治五年嗣王十  
年卒謚康康王庶子宸濠母馮針兒故娼也弘治  
八年封上高王十二年嗣王濠輕佻無威儀好弄  
喜兵嗜利狗色凌宗室瀆亂無禮養死士爲群盜  
江湖間及劫郡邑府庫財萬萬計術士李自然李

日芳妄言濠骨相天子也濠喜時時訶中朝事聞  
謗言輒喜聞言明聖朝廷治即怒不應正德初  
通逆瑾賂金錢無算得復護衛安化王反瑾誅革  
護衛未幾復結錢寧諸權奸又得復護衛益大肆  
擅殺都指揮戴宣逐布政使鄭岳御史范輅幽知  
府鄭瓛宋以方盡奪諸附王府民廬副使胡世寧  
言王橫無道不早裁抑禮樂征伐不復出自朝廷  
濠出金壁萬計遣庵余欽入京徧遺中朝内外文  
武大吏朱寧蕭敬張雄張銳江彬陸完石玠欲殺  
世寧不果謫戍遼東自是益復無顧忌日與李士

實劉養正王春謀不軌又見 武宗巡遊東宮久  
虛令典寶萬銳益賂諸奸佞欲召其子大哥入京  
以上廟燒香爲名幸事萬一成得自取正德十二  
年府典寶閻順內官陳宣劉良上變告濠疑出承  
奉周儀意盡殺儀家及典仗查武數百人令承奉  
劉吉持金錢又徧遺諸權奸佞幾殺順等於是逆  
謀益急妃婁氏累泣諫不聽大集群盜凌十一閭  
廿四吳十三等數千人置丁家山諸處四出行劫  
置庵畢真鎮守浙江約起事爲應又約廣西土官  
狼兵及南贛峒蠻是時士實養正春吉銳日夜與

濠謀恐起事以及名人心未服伺一日宴駕大位  
未定乘變即起萬一事成益遣奸黠人盧孔章等  
分布水陸孔道萬里傳報浹旬往返踪跡大露朝  
野皆知濠旦夕必反巡撫都御史孫燧日夜防遏  
濠托勦賊名置郡邑城郭兵倉事甚悉嘗嘆曰即  
賊起吾不滅賊賊必以吾所處分故速滅又連上  
七疏言濠反在旦夕濠諸奸邀諸途即不得諸權  
奸得濠金錢多恐事洩并誅又幸冀非望徃徃匿  
不聞十四年言官合詞言濠必反狀 上遣駙馬  
都尉崔元都御史顏頤壽太監賴義諭宸濠令改

過府中人以爲召濠六月丙子因諸司入謝濠酒  
遂稱密旨反劫燧及副使許達燧達叱濠無反自  
速死吾死不從汝爲賊遂殺燧達僞授士實太師  
養正國師吉太監春尚書凌十一等都指揮急走  
人令畢真友杭州爲應遣涂欽等攻九江南康王  
春等發旁縣諸賊黨九江南康城破七月壬辰進  
攻安慶知府張文錦守將崔文楊銳力禦不肯下  
濠以江西僉事潘鵬安慶人遣鵬招安慶文誅鵬  
家濠議僭大號改年順德士實養正言宜至南京  
正位然後改元布詔是時汀贛都御史王守仁已

傳檄遠近討濠濠不敢離南昌已而聞守仁兵未  
集士實養正造僞檄指斥朝廷謂 上以昔滅鄩  
高皇帝不血食建寺禁內雜處妓女胡僧玩弄邊  
兵身衣異衣至於市井屠販下流賤品事靡不樂  
爲棄置宗社陵寢而造行宮於宣府稱爲家裏贖  
貨無厭荒遊無度東至永平諸處西遊山陝三邊  
所過掠民婦女索取贖錢又謂常懸都太監牙牌  
稱威武大將軍又謂既奪馬指揮妻稱馬皇后復  
納山西娼婦稱劉娘娘原其爲心不能御女又將  
假此婦人以欺天下抱着異姓之子如前所爲也

留萬銳拱條等守南昌偽勅吉提督軍務參政王  
綸參贊軍務分諸賊爲五哨一百四十隊戊戌直  
趨安慶庚子攻城不克甲辰以天梯攻又不克安  
慶守益堅又聞守仁兵且至濠懼方欲退還南昌  
丙午聞守仁辛亥破南昌擒拱條萬銳及濠子三  
哥四哥濠大懼解安慶圍甲辰至樵舍乙卯遇守  
仁兵黃家渡戰敗丙辰又敗丁巳守仁急督戰火  
攻濠大敗婁妃投水死擒濠及其子大哥吉士實  
養正等濠曰紂用婦言亡而我不用婦言亡上  
初聞濠反江彬等幸出巡遊勸親征遂下詔暴其

罪惡告郊廟革封爵削屬籍親統六師征之詔未  
下守仁已擒濠濠六月丙子反七月丁巳就擒濠  
反謀雖久意僥倖倚奸人得竊位不欲顯言稱亂  
及事急反始掠省城兵器燧已名討賊移外郡倉  
卒不能備招賊又爲諸下邑遇不得去諸僞將皆  
賊徒未嘗知戰士實養正徒以區區文詞議論負  
時名不知兵諸附者皆富貴子弟聞守仁倡義誅  
討未及見兵皆逃避去燧所置初城遏賊不得逸  
盡就縛濠檻車至南京諸權奸得濠金錢者尚在  
武宗左右或握兵間通語言濠謂且得釋獨忌



守仁有權術兵精慣戰不敢動回鑿至通州誅濠  
弋陽王拱積攝府事初獻王五子二子盤輝臨川  
王天順五年罪廢爲庶人幽高墻三子盤煥宜春  
王四子盤炆新昌王五子盤煥信豐王弋陽王者  
靖王弟奠煜始封弋陽謚榮莊榮莊子覲鏢嗣弘  
治十年卒謚僖順僖順三子長二子天季子宸泐  
弘治十二年嗣正德九年卒謚莊僖莊僖次子拱  
積正德六年封鎮國將軍嘉靖元年攝王府事二  
年嗣弋陽王二十年爲稍設官屬子多焜嘉靖五  
年封鎮國將軍存者八

### 岷王

岷王榘初封岷州洪武二十六年建邸雲南二十  
八年之國建文初廢爲庶人流漳州靖難初復王  
王與西平侯沐晟交惡 上賜書諭王召戒晟仍  
還鎮未幾驕橫收印章殺官吏激變夷人沉酒廢  
禮 上怒罪其府僚奪冊寶尋念王建文中久囚  
繫復與冊寶洪熙元年徙武岡無王宮寄居州治  
久之始建王宮宣德元年岷世子徽煥輒赴京奏  
事勅止之途不止乃徽煥與奄謗其弟徽燦也  
上爲斬奄遣徽煥歸景泰三年乞移湖廣善地不

許王卒謚莊時徽燦已封鎮南王矣莊王無子鎮南王嗣王王弟廣通王徽燦謀反以蒙能陳李祥爲總兵事覺廢爲庶人四年王乞朝明年正月不許卒謚恭子音堃嗣卒謚子膺鈺嗣卒謚簡子彥汰弘治十七年以江陵王封世子嗣王嘉靖八年江川王膺燧請加祿戶部尚書梁材言岷府郡王歲祿五百石米鈔無支制也不許初彥汰與其弟南安王彥泥訐陰事彥泥廢爲庶人彥汰坐荒淫敗度抗制擅權幽囚嫡母焚死逼迫多官稱臣亦革爵爲庶人令其子世子譽榮攝理府事

### 谷庶人

嘉靖十年譽榮爲父乞恩辭攝府禮官以見潛鍾鏐比奏授彥汰冠帶理府事十二年彥汰乞復王不許十五年上兩宮徽號詔復彥汰王

谷庶人穗母郭惠妃滁陽王女也生三王長蜀王次代王次如意王或曰即谷王也洪武二十六年建邸宣德即上谷建文初靖難兵起庶人走還京靖難兵至穗守金川門登城望見成祖麾蓋開門迎成祖成祖入即位賜穗樂七奏衛士三百及金銀鈔馬加祿歲二千石官其護衛指揮僉

事張興都督僉事儀衛正張成都指揮使已而改封長沙之國驕橫尚書茹瑋不謁樞下詔獄死樞益肆無忌造戰船弓弩器械招匿亡命習兵法戰陣日與都指揮張成宦者吳智劉信等謀呼成師尚父智信國老令公成智信亦輒應偽作讖書以爲讖有十八云我高皇十八子陰傳播惑衆製巧燈上獻擇壯士入朝架燈又選壯士習音樂與燈並上乘隙爲變奪民田侵公稅殺無罪人長史盧廷綱屢諫不聽誣磔殺廷綱張興懼禍及已因奏事北京白其狀上未信興過南京啓太子

曰臣冒死聞上上顧不信臣言臣萬死願殿下垂聽憶臣言他日得無連坐滅臣家臣死不朽樞又遣劉信持所爲讖致書蜀王爲隱語曰德蒼時不可言桓文之事桓文時不可言德蒼之施欲結蜀王爲援蜀王切責不聽已而蜀王于崇寧王悅燔得罪父投樞樞納悅燔因詭衆曰往年我開金川門出建文君建文君今在我宮中我將舉事爲建文君復辟事將發會蜀王上變告永樂十四年七月上見蜀王䟽嘆曰朕待樞厚不宜有此心蜀王忠孝又不宜欺我張興嘗爲我言我不忍信

今果然立命中官持勅諭樞令樞遣悅燁還蜀樞  
不意使猝至不得已就徵十月至京入見上以  
蜀王章示樞樞頓首自伏言死罪死罪成國公朱  
勇都御史劉觀諸大臣廷劾樞曰周辟管蔡漢戮  
安長皆大義滅親陛下縱念樞柰天憲何上  
曰樞朕弟朕且令諸兄弟議明年正月楚王楨等  
各上議曰樞違祖訓謀不軌踪跡甚著大逆無  
道罪誅不赦上曰諸王奉大義國法固爾吾寧  
生樞二月削樞及其二子賦灼賦燾爵為庶人誅  
諸通謀者與以先發庶人罪狀得不坐

### 韓王

韓王松初封開原洪武二十七年三月上令王  
及濟王省秦晉燕周齊王分道而行至秋八月始  
還永樂五年卒葬南京謚憲子冲煖永樂八年嗣  
二十二年改國平涼宣宗初請徙江南不許言  
居第隘遣主事毛俊經度并建襄陵樂平二邸及  
岷州廣福寺陝西守臣言歲歉詔止勿建王又言  
傍廬已撤即冬寒立力愈難宣宗令繕王宮罷  
廣福寺又允王請蠲護衛三年屯種境內無鹽王  
請鹽詔聽王易鹽正統元年上書陳邊防上褒

谷正統五年卒謚恭子範圮正統七年以開城王  
嗣王九年卒謚懷弟範柳正統十一年以西鄉王  
嗣王景泰元年卒謚靖子徵針景泰元年以高陵  
王嗣王成化五年卒謚惠子偕流成化五年以廣  
安王嗣王十年卒謚悼弟偕瀟成化十二年以彰  
化王嗣王弘治十四年卒謚康無子弟之子旭樾  
弘治十七年以通渭王嗣王嘉靖十三年卒謚昭  
子融燧嘉靖十五年嗣請會鹽會茶戶部言茶易  
戎馬鹽供邊餉不許世子謨興諸王惟韓土瘠祿  
薄人衆甚貧徃徃凌劫有司平涼知府吳世良鄭  
圻任守德王松皆被窘辱旭樾等百五十人至闕  
總制尚書嘉靖十五年撫巡黃臣周鈇疏於朝榜  
諭禁戢

### 潘王

潘王模趙貴妃子洪武二十四年封永樂六年之  
國潞州 宣宗時王言諸子婚請展府府垣外盡  
民廬也 上曰毀民廬以展王府不可命工部徃  
闕繪圖來聞宣德六年卒謚簡子佶焯初封武鄉  
王宣德八年嗣王景泰中王父子與州官數置酒  
大會巡撫朱鑑上聞 上令諸王非時令萬壽節

不得輒會。有司飲酒著爲令。天順元年卒。謚康康。  
王九子。長天次。幼墾。天順三年嗣。正德十三年卒。  
謚莊莊。王七子。長銓。鉅。正德十三年以西陽王封。  
世子嗣。王嘉靖六年卒。謚恭。無子。次銓。鉢。初封靈  
川王。謚恭。懿。以長孫胤。移嗣。潘王贈。潘安王。恭王  
二子。長勛。壯。初封福山王。謚恭。和。以子胤。禮。嗣。潘  
王贈。潘靖王。靖王二子。長未名。封次胤。禮。初管府  
事後。嗣王卒。嗣懷。無子。安王銓。鉢。四子。長勛。潛。初  
襲父靈川王卒。謚恭。裕。以子胤。移。嗣王贈。潘惠王  
次勛。燧。勛。澈。皆鎮國將軍。四子未名。封惠王二子

長胤。移。初襲祖靈川王。懷王無子。嘉靖十年諸郡  
王爭嗣。王。上冊胤。移。嗣王次胤。旌。封鎮國將軍  
管靈川王府事。胤。移。五子。長未名。卒。次恬。燧。封世  
子。

### 安王

安王楹。洪武二十五年封平涼。永樂十五年卒。謚  
惠。無子。國除。盡革府僚。及樂戶。留典仗。校尉。百人  
守園。洪熙初。封韓恭王。平涼襄陵莊穆王。冲。焯。者  
恭王子也。支。封附王國中。英宗令官校。隸韓長  
史。供安王祀。暇日。給襄陵王使令。景泰五年。冲。焯

乞承祀安王正德十二年嗣襄陵王徵鈐遂請得樂戶祀安王明年樂平王徵鉅援鈐例亦請樂戶禮部言親王有樂戶郡王別城居者有事假鼓吹有司其附親王國者假樂戶移長史司因併革安王供祀樂戶嘉靖二年徵鈐及韓王旭樾又請上以安王故特允徵鈐徵鈐卒韓王融燧又令長史革祀安王樂戶徵鈐長孫旭種再請韓王融燧不許旭種上言禮樂自天子出韓王不得擅予奪融燧亦言親王郡王禮樂宜有降殺事下撫巡不能決條奏請制曰與樂戶爲安王祀也

### 唐王

唐王經母李賢妃洪武二十四年封永樂六年建國南陽十三年卒謚定子瓊煇永樂十九年嗣宣德元年卒謚靖妃高氏未冊而王卒自經死追封唐王妃靖王世子芝 卒弟瓊炘宣德三年嗣成化十一年卒謚憲世子芝 先卒謚悼簡無子弟芝址成化十三年以舞陽王嗣王二十三年卒謚莊子彌錡以穎昌王嗣王嘉靖二年卒謚成無子弟文成王彌鉗之子宇溫嘉靖四年嗣王贈父唐恭王二十一年宇溫獻金千兩銀萬兩助建太廟

賜王帶一歲加祿二百石

郢王 皇子楠

郢王棟母劉惠妃洪武二十四年封安陸二十七年治邸墾田成之國在國六年卒謚靖無子國除留內外官校守國供王祀妃郭氏武定侯英女王卒踰月妃痛哭曰賢王舍我去我寡婦也無子尚誰恃對鏡寫容付宮人又痛哭曰候吾諸女長與之令識母容也遂自經卒王四女宣德四年梁王之國移宮人居南京令諸郡主議婚舊國賜第南京太監王景弘資給女封光化穀城南漳郡主歲加祿各八百石一天郢王弟伊王伊王弟楠楠於諸子中最少洪武二十六年十二月生未逾月而卒

伊王

伊王樸母葛麗妃洪武二十一年生永樂六年之國河南歲祿僅二千石卒謚厲子顯煥嗣請選宮人不許令選之護軍家酬直勿抑勒卒謚簡子勉望正統八年封上洛王嗣王天順八年卒謚安子諱鉏成化二年嗣十一年卒謚悼季弟諱鏐成化四年封郟城王十二年嗣王正德三年卒謚定子

同生者... 卷三... 三十三



訂淵弘治三年封世子正德六年嗣嘉靖五年卒  
謚莊弟訂淳弘治六年封濟源王嘉靖六年嗣王  
訂淳言祿薄先朝乞得河南課鈔五萬七千七百  
貫准祿米八千嘉靖八年革諸王請乞稅租田湖  
伊府課鈔亦在革中乞補祿戶部言伊祿二千石  
通給本色 英宗加米五百石 憲宗又加麥一  
百五十石課鈔本成化弘治正德年請乞非永樂  
以前欽賜比况河南一省諸王缺祿八十餘萬不  
許二十一年卒謚 子典楨以世子嗣王  
皇明同姓諸王傳第二卷終 子履準校正

皇明同姓諸王傳第三卷

吾學編第十六

海鹽鄭曉

虞王

虞王雄英懿文太子長子洪武十五年五月巳酉  
朔卒追封虞王謚懷懿鍾山令侍臣素服步送

吳王

吳王允熲建文君弟懿文太子第三子洪武十年  
十一月生三十一年封杭州未之國建文四年七  
月靖難後降封廣澤王居福建漳州是年九月召  
還京以不能諫正建文君降庶人永樂十三年卒

英宗復辟出吳庶人居鳳陽者但有庶母姊嬬老婦五六人時年八十矣

### 衡王

衡王允燧洪武三十一年封未之國建文四年七月降封懷恩王居江西建昌是年同吳王召還京廢爲庶人

### 徐王

徐王允熾洪武二十四年六月生生八年而封未之國建文四年七月降封敷惠王隨母呂太后居太子陵永樂二年改封甌寧王奉太子祀未遣之

簡  
國四年二月邸中忽火起驚仆地卒年十六謚哀

### 建文君太子

太子文奎洪武二十九年十月晦生 上日十月晦月日皆終不喜三十一年建文君即位立爲皇太子靖難兵入京年七歲矣莫知所終

### 建文少子

少子文圭建文三年生生二歲建文君遜位靖難後號爲建庶人者是也幽中都廣安宮 英宗復辟憐庶人無罪久繫禁欲寬庶人李賢贊曰堯舜

心也請於 太后出於鳳陽歲給薪米聽婚娶出入自便又與閹者二十人婢妾十餘人給使令遣奄牛玉入禁諭庶人庶人伏地頓首謝且喜且悲有阻議者 上曰有天命者任自爲之庶人入禁時纔二歲年五十六七始出鳳陽不識牛馬世傳成祖入宮時建文君有幼子老媪教之牽 成祖衣哭跪前求食曰孩兒餓矣饑殺孩兒矣 成祖亦哭曰汝生帝王家寧有餓死理命善撫之不知此建文君第幾子抑即太子少子也或曰牽衣哭者 成祖育諸宮中未詳

### 漢庶人

漢庶人高煦 成祖第二子初 太祖召秦晉燕周四世子及庶人輩學於京師顧不肯學日遊嬉輕躁無行建文即位初 仁宗及庶人奔喪京師舅氏魏國公徐輝祖密戒之不聽盜輝祖馬不朝辭渡江走歸途中輒殺民吏至涿州又殺驛丞其凶橫淫荒狡黠險狠跋扈不可御久矣靖難兵起仁宗居守庶人有膂力善騎射從行頗有功江上之戰靖難兵稍却庶人適引胡兵至戰勝已而議建儲藩府舊臣淇國公丘福駙馬王寧善庶人時

時稱二殿下功高。成祖曰：居守功高於扈從，儲貳分定於適長。且元子仁賢，真社稷主。汝等勿復妄言。永樂二年，立東宮，封庶人漢王。國雲南，怏怏不肯去。曰：我何罪？斥我萬里，改青州。又怏怏不肯去。曰：我何罪？置我瘠土，留京師。又請得天策衛為護衛。曰：唐太宗天策上將，吾得之，豈偶然？又益請兩護衛。曰：我英武，豈不類秦王？成祖狩北平，庶人益不法，陰蓄壯士，肆出盜劫。兵馬指揮徐野驢擒之。庶人怒，手鐵爪撾殺徐，指揮衆莫敢言。遂僭用天子車服。十四年，成祖巡北京，聞不豫，逆謀

益著。成祖聞之，怒，促駕南還，召庶人，褫冠衣，囚繫西禁門，條其罪惡數十事，且誅之。仁宗頰首伏地，涕泣力救。久之，削兩護衛，誅其左右狎暱，徙封樂安州，促即日行。成祖顧謂東宮及太孫曰：樂安近北京，即聞變，朝發可夕擒。至樂安，然望異謀，益急。東宮數書戒，竟不悛。成祖北征，晏駕，庶人子瞻圻在北京，凡朝廷事，潛遣人馳報。一晝夜六七行。庶人日亦數十遣人入潛，伺京師幸有變，仁宗固知之。顧益厚，遇書召至，倍加歲祿，賜賚萬計。先是，瞻圻憾父殺其母，屢發父過惡。成祖曰：

尔父子何忍也至是庶人悉上瞻圻前後覘報中朝事又曰廷議旦夕發兵取樂安 仁宗召示瞻圻曰汝處父子兄弟間讒搆至此穉子不足誅遣鳳陽守皇陵二十二年十月封庶人嫡子瞻垣爲漢世子次瞻空濟陽王瞻域臨淄王瞻埜昌樂王瞻堦淄川王瞻坪齊東王瞻壻任城王瞻垓海豐王瞻邲新泰王未幾 仁宗大漸 宣宗自南京奔喪即位賜二叔視他府特厚庶人日有請及言朝政 上曲徇其意索駝與之駝四十索馬與之馬百二十索袍服又與之袍服庶人益自疑宣德

元年八月壬戌朔遂反遣枚青潛來京約英國公張輔內應輔暮夜繫青聞於朝又約山東都指揮靳榮等反濟南爲應又散弓刀旗令真定諸衛所盡奪傍郡縣畜馬立五軍都督府指揮王斌領前軍韋達左軍千戶盛堅右軍知州朱恒後軍諸子各監一軍庶人率中軍世子瞻垣居守指揮韋弘韋興千戶王李智領四哨部署已定僞授王斌朱恒等太師都督尚書等官御史李濬樂安人棄其家變姓名間道詣京上變言庶人刻日取濟南然後率兵犯闕陞濬行在左僉都御史遣中官侯

恭賜書庶人言昨枚青來言叔督過朝廷予不信  
皇考至親惟二叔子所賴亦惟二叔小人離間不  
得不敷露中懇且傳播驚疑或有乘間竊發者不  
得不略爲之備惟叔鑒之泰至樂安庶人盛兵見  
泰傲倨不拜勅南面坐跪泰大言曰永樂中信讒  
削我護衛徙我樂安 仁宗徒以金帛弭我今又  
輒云 祖宗舊制殊令我鬱鬱豈能久居此汝試  
觀我士馬豈不橫行天下汝歸報急縛奸臣來徐  
議吾所欲泰懼唯唯還 上問庶人何言對無所  
言又問庶人治兵何如對無所見 上曰泰二心

已而錦衣官從泰往者具陳所見 上大怒泰是  
月丁卯庶人遣百戶陳剛進疏言 仁宗違洪武  
永樂舊制與文臣誥勅封贈今修理南巡席殿等  
事爲朝廷過斥二三大臣夏原吉等爲奸佞並索  
誅之又書與公侯大臣驕言巧詆污駸乘輿 上  
嘆曰庶人果反立召張輔諭親征輔對曰庶人素  
怯懦今所擁非有謀能戰者願假臣兵二萬擒獻  
闕下 上曰卿誠足擒賊顧朕新即位小人或懷  
二心行決矣令大索樂安奸謀乙丑勅遣指揮黃  
謙同總兵平江伯陳瑄防守淮安勿令賊南走令

指揮芮勛守居庸關令法司盡弛軍旗刑徒從征  
戊辰命定國公徐景昌彭城伯張昶守皇城安鄉  
伯張安廣寧伯劉瑞圻城伯趙榮建平伯高遠守  
城已巳命豐城伯李賢侍郎郭璉郭敦李昶督軍  
餉命鄭王瞻埈襄王瞻墀留守北京廣平侯袁容  
武安侯鄭亨都督張昇山雲尚書黃淮黃福李友  
直協守輔少師蹇義少傅楊士奇少保夏原吉太  
子少傅楊榮太子少保吳中尚書胡濙張本通政  
使顧佐扈行陽武侯薛祿爲先鋒辛未發京師癸  
酉過楊村馬上顧問從臣曰試度庶人計安出或

對曰樂安城小彼必先取濟南爲巢窟或對曰彼  
曩不肯離南京今必引兵南去 上曰不然濟南  
雖近未易攻聞大軍至亦不暇攻護軍家在樂安  
不肯棄此去南京庶人外多跨詐內實懦怯臨事  
狐疑展轉不能斷今敢反輕朕少年新立衆心未  
附又謂朕不能親征卽遣將來得以甘言厚利誘  
弭事成事今聞朕行已膽落敢出戰乎至卽擒矣  
戊寅獲樂安歸正人益知賊中虛實言賊初約斬  
榮取濟南山東布按二司官覺之防榮不得發又  
聞大軍至不敢出朱恒應天人力言宜引精兵趨

南京得南京大事成矣衆不從曰尔顧得赴家柰  
我輩何又曰庶人初聞陽武侯等將兵攘臂喜曰  
此易與及聞親征始懼於是授歸正人官厚賞給  
榜令還樂安諭衆 上仍書諭庶人曰張敖失國  
本之貫高淮南受誅成於伍被今六師壓境王即  
擒獻倡謀者朕與王除過恩禮如初不然一戰成  
擒或以王爲奇貨縛來獻悔無及矣 上英暢神  
武詞旨明壯我師氣盛龍旗鉦鼓千里不絕庚辰  
祿馳奏前鋒至樂安庶人約明日出戰 上令大  
軍蓐食兼行文大臣請慎重武大臣曰林莽間或

設伏百里趨利不可 上曰兵神貴速我抵城下  
營彼阱中虎爪牙安施大軍至烏合之衆方洶洶  
何暇設伏遂行夜分至陽信時慶雲陽信吏人皆  
入樂安城無一來朝者辛巳昧爽駐蹕樂安城北  
城中黑氣黯黯我兵壁其四門賊乘城舉砲我軍  
發神機銃箭聲震如雷城中股慄諸將請即攻城  
上不許勅諭庶人再遣勅皆不答圍中人多欲執  
獻庶人者庶人密遣人詣行帳願假今夕訣妻子  
明日出歸罪 上許之是夜庶人盡焚兵器及通  
逆謀書壬午移蹕樂安城南庶人將出城王斌等



力止日寧一戰死無爲人擒庶人給斌等復入宮  
遂潛從間道出見上群臣請正典刑不允以劾  
章示庶人頓首言臣罪萬萬死惟陛下命上  
令庶人爲書召諸子同歸京師赦城中罪止同謀  
脇從者不問遂執王斌等下行錦衣獄癸未令祿  
尚書張本鎮撫樂安改樂安爲武定八月乙酉班  
師命中官頌繫庶人父子赴北京錦衣械繫王斌  
朱恒盛堅典仗侯海長史錢巽教授錢常至京皆  
伏誅惟長史李默以嘗諫免死謫口北爲民誅榮  
榮子義天津鎮守都督孫勝山西都指揮張傑楊

雲青州左衛指揮使誠滄洲衛指揮鄭典皆約  
舉城應者先納軍馬糧仗數事覺相繼誅六百四  
十餘人其故縱與藏匿坐死戍邊者一千五百餘  
人編邊氓者七百二十人初庶人被執鎖繫逍遙  
城一日上欲往視左右止之不聽及至熟視久  
之庶人出不意伸一足勾上仆地左右急扶起  
亟命壯士昇銅缸覆之缸約重三百斤庶人有力  
項負之輒動積炭缸上如山燃炭逾時火熾銅鎔  
庶人死諸子並死

趙王 四皇子

趙王高燧 成祖第三子永樂元年封彰德洪熙  
元年就國王負靖難功密與漢庶人謀奪嫡時時  
譖東宮傷其官寮繫獄多死者永樂二年居守北  
京信用邪說恣行不法七年 上聞之大怒誅其  
長史顧晟褫王衣冠 東宮力解得免擇國子司  
業趙亨道董子莊爲長史二人能輔導王稍稍改  
行二十一年五月 上不憚護衛指揮孟賢等結  
曆官王射成及內侍養子造僞詔俟晏駕詔從中  
下立趙王總旗王瑜有姻家高以正者爲賢等畫  
此謀謀定告瑜瑜上變告 上曰豈應有此立捕

賢得所造詔誅賢射成以正及內侍諸養子升瑜  
遼海衛千戶王大懼又稍稍斂戢 仁宗即位加  
漢趙二王祿歲二萬石通前三萬石封王長子瞻  
坂爲趙世子次瞻塙爲安陽王 宣宗初即位賜  
田園八十頃漢庶人反誅班師至單橋陳山迎駕  
遂言曰趙王與漢庶人逆謀久矣今宜藉此兵威  
移指彰德擒趙王否趙亦反側不自安異日復勞  
聖慮 上不聽楊士奇亦以爲不可山又請尚書  
蹇義夏原吉言方略邀二人共請 上意不忍曰  
先帝愛二弟漢王自絕於天朕不敢赦趙王反形

未著朕終不忍負先帝也高煦至京又言嘗遣駱  
指揮阮內使與趙通謀上以漢庶人詞群臣章  
遣廣平侯持示王王大懼上還常山中護衛及  
群牧所儀衛司官軍校上與儀衛司是年瞻堧  
卒年十七謚悼僖王在位二十九年宣德六年卒  
謚簡瞻堧宣德七年以安陽王嗣王卒謚惠子祈  
嗣卒謚悼子見嗣卒謚靖子祐棨嗣卒謚莊子  
厚煜嗣四皇子未封卒

鄭王

鄭王瞻堧仁宗仲子母李妃永樂二十二年

封漢庶人反王與襄王居守宣德四年之國鳳翔  
王請安王竹園韓王以安王舊邸得竹園上曰  
園在鳳翔去平涼遠與鄭王便正統八年乞徙徙  
懷慶留京邸明年之國成化二年卒謚靖子祁鏜  
成化四年嗣乞河堧地弘治八年卒謚簡世子見  
滋卒以子祐杓封世子弘治十年嗣王贈父鄭僖  
王祐杓正德二年卒謚康無子見滋弟東垣端惠  
王見湏以子祐樸正德四年嗣王贈鄭定王祐樸  
十六年卒謚懿子厚烷嘉靖六年嗣車駕南巡王  
來迓賜幣物加祿歲三百石

蘄王

蘄王瞻垠末樂十九年卒贈蘄王謚獻葬京師西山

越王

越王瞻墉未之國 宣宗賜昌平縣莊田四十頃卒謚靖妃吳氏謚貞惠葬京師西山無子國除已巳之變虜入王墉廬掠祭器去

襄王

襄王瞻墉母 昭皇后末樂二十二年封未之國上崩監國漢庶人及留守宣德四年之國長沙正

統元年遷襄陽七年來朝景泰三年乞得山地百頃奪門時石亨等欲殺于謙王文謂謙等通奄王誠盜金符迎王 英宗因詔王來朝相見甚歡宴便殿王避席請曰臣過汴汴父老遮道言按察使王槩賢誣下詔獄臣途中詢槩人咸謂槩冤願皇上加察 上立命法司雪槩王辭歸 上送至午門王伏地不起 上曰叔父欲何言王頓首曰萬方望治如飢渴願 皇上省刑薄斂 上拱手謝曰敬受教四年又來朝 上爲峴山漢水賦襄陽四景歌賜王成化十四年卒年七十三謚憲長

子祁鏞正統八年封世子成化十五年嗣弘治元年卒謚定定王三子長見淑成化十六年封世子弘治二年嗣明年卒謚簡簡王二子祐材弘治三年封世子明年嗣與邸爭地灘逮七十二家獄久不決大理卿汪綸兩解得已十七年卒謚懷無子弟祐櫝弘治四年封光化王正德中嗣王嘉靖四年卒謚 棗陽王者名祐想嘉靖初上疏乞尊崇本生考妣爲帝后入廟祀又上言乞許宗、執業爲士農得自贍免飢寒無煩朝廷歲祿下禮部議不許

### 荆王

荆王瞻峒母張順妃永樂四年生二十二年封宣德四年之國建昌乞南城縣司獄又乞近閑田正統四年改蘄州景泰元年十二月上疏請朝 上皇不許四年卒謚憲二子長祁鎬正統八年封世子景泰六年嗣天順五年卒謚靖靖王三子長見瀟天順中嗣弘治五年坐不法命太監蕭敬駙馬都尉蔡震都御史戴珊召王至并其長子祐柄降庶人遷置武昌見瀟弟見溥成化二年封都梁王十三年卒謚悼惠其妃何氏賜自盡子祐櫝弘治

七年以都梁王進封荆王十七年卒謚和和王二子長厚烜弘治十六年封世子正德二年嗣嘉靖中病辭祿不允王二子長戴盛嘉靖九年封末定王永定王一子

### 淮王

淮王瞻塿母李賢妃永樂二十二年封宣德四年之國韶州開府府治正統元年遷饒州十一年卒謚靖子祁銓正統十三年嗣卒謚康世子見濂早卒見濂弟清江王見濂以子祐祭嗣贈淮端王祐祭弘治十八年嗣王嘉靖三年卒謚定無子弟鎮

國將軍祐楨嘉靖四年嗣王十六年卒謚莊子厚嘉靖八年封世子十七年嗣

### 滕王

滕王瞻塿母郭貴妃永樂二十二年十月封宣德改元卒年十七謚懷塋京師西山無子國除其長史姚友直事王王喜其恭謹 宣宗愛王爲陞友直雲南左叅議掌長史司事

### 梁王

梁王瞻垵母恭肅郭貴妃永樂二十二年封即郢邸開府宣德四年之國承奉孔勤侮詈王 上曰

梁王朕親弟奴敢如是逮勤王又爲解。上曰羣  
奴湯王耳竟誅勤未幾上表不恭有司請治長史  
上以王故特不問襄獻王自長沙徙襄陽過安陸  
王出迎明日獻王入城相見歡甚又明日辭去王  
泣曰嗟乎吾兄弟不得更復相見柰何正統元年  
上言府卑濕乞更爽塏地。上曰郢中歲屢歉俟  
有秋理之竟不果徙六年卒謚莊塋安陸妃紀氏  
繼魏氏無子國除景泰二年魏妃卒妾張生女二  
皆封郡主封張王夫人掌王宮事成化十六年亦  
卒梁故盡得郢田宅園湖後皆賜襄王。睿宗封

安陸得梁郢邱田供二王祀事

衛王

衛王瞻延未之國。仁宗簡舊宮臣司直金寔爲  
王左長史宣德初凡郊社陵廟禮每命王攝事正  
統三年卒謚恭妃楊氏謚貞烈無子國除

許王

許王見淳。英宗子母王惠妃王生時。英宗北  
狩未還景泰廢太子封沂王也并封沂王弟見清  
榮王見淳許王景泰三年十一月許王卒於京師  
禮部請喪用親王禮內批王幼殺其禮謚悼葬西

山

德王

德王見潯天順元年三月六日復東宮是日立德  
秀崇吉四王歲祿各本色萬石德王初封德州改  
濟南成化二年就國二十一年請業南旺湖以漕  
渠故不許正德十三年卒謚莊子祐榕正德十六  
年嗣嘉靖十九年卒謚懿子厚燉十二年封世子  
卒謚懷順世子載塔十九年嗣贈厚燉德懷王景  
泰元年五月丁未正使都督張軌副使太子太保  
吏部尚書何文淵持節封裕陵第二子見清為榮

王或曰即德王也又有三皇子未封卒

秀王

秀王見潯母高淑妃景泰三年生王於南城成化  
三年封國汝寧左長史劉誠獻王千秋日鑒錄王  
大喜之國時淹於途民以為擾亡蜚為言王輒急  
行抵國宦豎言王居隘請移先師廟廣王居王不  
聽一日兩長史講書西伯戡黎左長史主吳氏說  
曰戡黎者武王也右長史趙銳主孔氏說曰文王  
寔戡黎兩長史辯大爭王徐曰先皇簡二先生輔  
余經義即未有定論何嫌往復乃爾動色兩長史



皆頓首謝王卒謚懷塋京師西山妃黃氏無子國  
絕王有宮人陳氏召還京成化中特封爲夫人

### 崇王

崇王見澤天順元年封成化十年之國汝寧弘治  
八年 孝肅太后思見王 上勅召王朝禮官倪  
岳言二年間三王之國郡縣供需兵民皆困崇王  
後來往返勞費何以堪兼水溢旱蝗舟車所經恐  
有他虞親王來朝雖有故事然自洪熙宣德以來  
已鮮舉行 英宗復辟襄王奉詔來朝雖篤敦叙  
之恩實塞疑讒之際宜勿召王便初 上不允岳

言已而中止十八年卒謚簡簡王四子長祐察弘  
治中嗣正德六年謚靖靖王四子長厚燿正德九  
年嗣嘉靖十六年卒謚恭長子載境八年封世子  
十七年嗣乞修府下巡撫議費銀八萬七千兩工  
部言親王修府例役護儀牧人不得輒勞民 上  
不允十九年王請父恭王墓表禮部言韓府襄陵  
莊穆王卒 憲宗嘗允其子範址請令詞臣撰銘  
刻石崇王曾祖皆嘗賜墓表請如王奏 上若曰  
宗室薨逝給壙誌此 祖宗典制安得有賜表事  
襄陵王立石已非例崇兩王表墓皆先朝誤恩後

有王家乞請禮部宜考累朝體例議覆

忻王

忻王見治母宸妃天順二年生生九歲而封封七年未之國卒謚穆葬京師西山

吉王

吉王見浚國長沙陳友諒初據長沙友諒誅長沙稅畝特重民流移多荒棄王因請得賜名鷄鵝食田十二萬畝徵租尤重嘉靖初令減十五嘉靖六年卒謚簡一子祐扶弘治四年封常山王正德四年進封吉世子五年卒謚悼莊二子長厚焞正德

十四年封吉世孫嘉靖八年嗣王十年贈父吉悼王明年乞長沙府湘潭商稅邸租不許卒謚定二子長載均嘉靖十五年封光化王十九年嗣王

徽王

徽王見 成化十七年之國鈞州歲祿本色萬石妃黃氏與秀王妃兄弟也弘治二年乞陞州爲府吏部尚書王恕言肅藩荆岷皆封州鈞不得獨陞府從之王卒謚莊子祐檯正德三年以興化王進世子嗣嘉靖四年卒謚簡子厚焞嘉靖五年以安邑王進世子嗣厚焞父子繼請陞鈞州爲府朝議

不許嘉靖中車駕南巡王迓送恭加祿歲三百石  
侑金幣

### 懷獻太子

懷獻太子見濟 景帝長子毋杭妃景泰三年四月  
思明土酋黃玠者初以功授丘溫衛指揮歷陞  
廣西都指揮使守備潯州思明土知府瑠庶兄也  
瑠老子鈞襲知府玠欲殺鈞奪知府與其子矯軍  
門令徵兵思明令其子糾諸心腹驍悍數千人去  
府城三十里結寨夜馳破府城滅瑠家支解瑠父  
子納甕中瘞後圃即引衆還寨明日報至佯不知

驚哭仆地走思明發喪尋瑠父子屍不得又慟哭  
仆地揮淚遣人告玠急捕賊復此家門大讐方玠  
子殺瑠時瑠有僕福童見玠子并識其左右人脫  
走憲司訴玠父子殺瑠父子狀郡中人亦皆知賊  
本玠父子也左副總兵武毅疏聞于朝玠大懼謀  
於侍郎江淵令遣千戶袁洪走京師上奏請廢太  
子立見濟爲太子疏曰太祖百戰艱難取天下期  
傳之萬世往年 上皇輕身禦虜文武將吏十喪  
八九駕陷虜廷寇至都門幾喪社稷不有 皇上  
臣民何歸今且踰二年皇儲未建臣惟人心易搖

多言難定爭奪一萌禍亂不息 皇上即循遜讓之美復全天敘之倫恐事機叵測反覆靡常語曰天與不取反受其咎近日仰觀天象土星逆行入太微垣與諸災變皆可畏愕願早留意萬一羽翼長養勢權轉移委愛子於他人寄空名於大寶階除之下變爲寇讐肘掖之間自相殘感此時悔之晚矣乞與親信文武大臣密定大計以一中外之心絕覬覦之望疏入 景帝大喜曰萬里外有此忠臣亟下廷臣會議且令釋圻罪陞都督是月乙酉禮部尚書胡濙侍郎薛琦鄒幹集文武羣臣廷

議衆相顧莫敢發遲疑久之司禮太監興安厲聲曰此事不可已即以爲不可者勿署名無得首鼠持兩端群臣皆唯唯署議於是濙等暨魏國公徐承宗寧陽侯陳懋安遠侯柳溥武清侯石亨成安侯郭晟定西侯蔣琬駙馬都尉薛桓襄城伯李瑾武進伯朱瑛平鄉伯陳輔安鄉伯張寧都督孫鏜張輓劉深張通郭瑛劉鑑張義錦衣衛指揮同知畢旺曹敬指揮僉事林福尚書王直陳循高穀何文淵金濂于謙俞士悅左都御史王文王翱楊善侍郎江淵俞山項文曜劉中敷沈翼蕭鎡王一寧

李賢周瑄趙榮張敏通政使李錫通政欒惲王復  
叅議馮貫卿蕭維禎許彬蔣守約齊整李賓少卿  
張固習嘉言李宗周蔚能陳誠黃仕雋張翔齊政  
寺丞李茂李希安柴望酈鏞 詢王溢翰林學士  
商輅六科都給事中李讚李傑李春蘓霖林聰張  
文質十三道御史王震朱英涂謙丁泰亨強宏劉  
琚陸厚原傑嚴樞沈義楊瑄王驥左鼎上言父有  
天下必傳於子陛下膺天明命中興邦家統緒之  
傳宜歸聖子黃玘奏是制曰可朕上請 聖母上  
聖皇太后太后言予老矣願宗社安天下得太平

人心既如此不可拂朕敬承慈命禮部具儀擇日  
以聞即日簡置東宮官懋宣淡直四人太子太師  
溥循穀謙四人太子太傅輓文淵瀛南京禮部尚  
書儀銘士悅工部尚書賈蕪大理卿石璞都御史鎰  
文翽九人太子太保淵一寧滋三人太子少師山  
太子少傅錫維禎兵部左侍郎俞綱都御史羅通  
四人太子少保輅兵部左侍郎兼左春坊大學士  
中敷太子賓客嘉言詹事文曜琦少詹事榦左庶  
子侍讀彭時侍講劉儼左右春坊大學士周旋趙  
恢左右庶子修撰林文侍講徐理左右諭德修撰

李紹侍講劉定之司經局洗馬侍講楊昇倪謙呂  
原修撰柯潛左右中允李侃御史魏齡詹事丞編  
修周洪謨劉俊檢討錢溥編修岳正左右贊善編  
修周安李泰林聰典籍鄒循左右司直郎侍書陳  
穀徐似監丞鮑相縣永高誠左右清紀郎檢討曾  
暹傅宗五經博士陸藝典籍李鑑左右司諫編修  
王輿校書中書舍人劉鉞趙昂正字教諭劉潔錄  
事序班楊欽王政周寧傳榮通事舍人凡東宮公  
孤皆支二俸五月甲午立見濟爲皇太子廢汪皇  
后立見濟母杭妃爲皇后詔曰天佑下民作之君  
實遺

安於四海父有天下傳之子斯本固於萬年大赦  
天下先是一日陳儀仗奉天門有男子執赤挺直  
入擊香亭奮呼曰先打東方甲乙木諸內使急縛  
男子詔付錦衣獄瘐死乙未以東宮令大賞文武  
官吏軍士丙申禮部言太子冲年百官朝朔望丁  
未柳溥于謙克正副使持節更封太子爲沂王癸  
丑以立太子故賞諸親王公主乙卯賞邊鎮文武  
內外羣臣又加賞內閣陳循高穀學士江淵王一  
寧蕭鎡商輅各董金五十兩六月以后兄杭聚爲  
錦衣正千戶四年二月乙未太子冠命胡濙持節

掌冠高穀贊冠蕭鎡宣戒勅甲辰冠沂王及其弟  
榮王命陳循于謙持節掌冠何文淵儀銘贊冠商  
輅宣戒勅十一月以御史張鵬言簡東宮師傅講  
讀官 上命胡濙王直陳循高穀王文儀銘江淵  
蕭鎡俞山俞綱商輅日更番侍班彭時日專講書  
李傑李齡錢溥劉吉日專侍讀書王謙趙昂更日  
侍書越四日太子薨謚懷獻葬西山天順元年降  
稱懷獻世子

悼恭太子

悼恭太子祐極 憲宗長子成化七年十一月已

四月立為皇太子是年十二月上旬彗星見東方未  
幾皇太子卒葬西山

岐王

岐王祐 封德安弘治中請迎母養不許許諸王  
有子別居者得迎養其母母有子多亦從一子無  
子者移別宮著為令王卒謚惠妃王氏葬西山國  
除

益王

益王祐檣封江西建昌母張德妃德妃生王及衡  
王汝王茂陵諸王皆歲祿本色萬石弘治中進馬

嘉靖十五年奸人班明誣昌國公通王有逆謀得  
白十八年卒謚 四子長厚燁正德四年封世子  
今嗣王弟崇仁王厚炫金溪王厚煌玉山王厚燿  
凡三王嘉靖初廷臣請以崇仁王後 睿宗嗣興  
王不許厚炫五子載增封長子次載環載坑載堞  
載壤厚煌一子載學載增一子未名

### 衡王

衡王祐輝成化二十三年封青州卒謚恭子厚燿  
初封江華王嘉靖十年卒封世子十八年嗣王有  
賢行

### 雍王

雍王祐 封衡州弘治四年之國十一年邸震壞  
正德二年卒謚靖妃吳氏葬西山國除 孝惠邵  
太后三子 睿宗及岐雍二王也

### 壽王

壽王祐楛封保寧改常德嘉靖 年卒謚 無  
子國除壽王有兄八皇子未封卒

### 汝王

汝王祐棹封衛輝弘治十四年之國正德十五年  
王以婚故請預支食鹽十年年三百引 上曰王



以婚禮請宜別給長蘆鹽二千引食鹽如故嘉靖十八年車駕南巡王迓於途甚恭上喜加祿歲五百石賜金幣

### 涇王

涇王祐樞母楊恭妃弘治四年封十五年之國沂州卒謚簡妃曹氏子厚烜嗣病辭祿不許未幾卒謚無子國除葬西山長史沈煥以王卒故改南京鴻臚少卿

### 榮王

榮王祐樞母潘端妃弘治四年封常德正德初留

京邸劉瑾惡王與吏部尚書張綏謀逐王就國王嘗爲諸子請得食鹽菜戶嘉靖四年請沅江西港天心團坪淶池河泊稅八年盡取諸稅供王祿十八年卒謚莊六子長厚勲正德中封世子嘉靖十一年卒謚懷穆子載瑾嘉靖十八年封世孫嗣贈其父榮懷王

### 申王

申王祐楷涇王同母弟也成化二十三年生生五年而封封十一年而冊妃項氏又明年而卒謚懿葬京西蘭山無子國除王邸建於四川敘州未之

國嘉靖中弼邸僅得銀萬兩

### 蔚王

蔚王厚 孝宗第三子母 孝康皇后早夭謚悼  
葬西山

### 岳王

岳王 睿宗長子母 慈孝皇太后弘治十三年  
六月生生五日而卒嘉靖初贈岳王謚懷墓在承  
天 睿宗子女五長岳王次長寧長公主生四歲  
卒次善化長公主十歲卒初皆封郡主嘉靖初贈  
長公主又次鄔公主又次謝公主皆婚而卒駙馬

都尉鄔景和謫居蘓州謝詔掌宗人府事二十九  
年四月賜岳王名厚熙

### 靖江王

靖江王守謙 太祖長兄南昌王之孫也南昌王  
從祀廟庭子文正少孤其母王氏守節撫文正依  
太祖太祖愛之比長涉傳記有才略從渡江克太  
平破陳也先取建康擢樞密院同僉辛丑改院為  
大都督府文正為大都督節制中外諸軍事尋統  
元帥趙德勝等鎮守南昌號令明肅癸卯四月陳  
友諒圍南昌用雲梯攻具百道進擊文正主畫軍

中隨方應敵剪獲甚衆友諒獲吉安守將劉齊朱叔華臨江同知趙天祐徇城下文正不爲動至六月援兵不至文正遣千戶張子明告急建康敵攻城益急文正遣捨命王詣友諒營詐約降友諒緩攻及期城上旗幟一新至暮不出友諒縛捨命王城下殺之子明從水關潛出夜行晝止半月始達建康上問友諒兵若何對曰彼兵雖盛戰鬪死者亦不少今江水日涸賊巨艦將不利又師久乏糧若援兵至必可破上謂子明汝歸語文正堅守一月吾當自取之子明還至湖口被執友諒使

呼文正出降子明陽許之至城下呼曰大軍旦夕至諸君宜固守以待友諒殺子明文正守益堅七月上統舟師二十萬來援友諒始解圍逆戰鄱陽湖竟敗死禁江口甲辰文正遣部將何文輝等討平江西未附州縣吳元年春江西按察使李飲冰言文正驕僭不遜有怨言上詰責大懼謀叛降張士誠上大驚曰噫此子不才至此非吾自行不可即日登舟至南昌泊城下召文正文正倉卒出謁上泣曰汝何爲輒起此意遂載與俱歸群臣劾請伏法上曰吾兄惟此兒免文正官安

置桐城召其子鐵柱語之曰兒無恐爾父違訓教  
忘艱難恣兒狡貽我憂我育汝汝長且封汝我終  
不以汝父故廢汝未幾文正卒洪武三年封鐵柱  
靖江王改名煒又改名守謙國於桂林桂林獨秀  
山前有元順帝潛邸改爲王宮未幾以淫虐廢爲  
庶人使田鳳陽閱七年復其王使居雲南賜璽書  
戒諭比至雲南益貪暴召還安置鳳陽又橫恣不  
法召至京撻而錮之二十五年卒子贊儀尚幼  
上憐宗室諸王皆無後命爲世子留京師贊儀恭  
慎好學能書洪武三十年春遣省晉燕周楚齊蜀

湘代肅遼慶谷秦諸王先自楚湘入蜀歷陝西出  
河南上山西抵大同宣府北平東至大寧遼東轉  
於山東擇文武忠厚之士以從以贊儀年幼欲其  
知親親之義且令涉山川險易也永樂中遣之國  
卒謚悼僖子佐敬嗣卒謚莊簡子相承嗣卒謚悼  
順子規 嗣卒謚昭和子約麒嗣卒謚 子經  
扶嗣卒謚安肅子邦聲嘉靖六年嗣先是靖江府  
食鹽歲給銀廣東至桂林市鹽至是乞支本色不  
許又乞桂林府稅銀亦不許

皇明同姓諸王傳第三卷終

子履準校正

阿奴詩三傳  
乃卷三

三



國

